

Od početka godine u FBiH dizel poskupio šest a benzin sedam feninga po litru

Prosječna cijena litra dizel goriva u Federaciji BiH u periodu od januara do aprila porasla je za šest feninga, a bezolovnog benzina 95 za sedam feninga, potvrđeno je Feni u Federalnom ministarstvu trgovine.

Prosječna cijena dizela BAS EN 590 po litru u januaru i februaru je iznosila 2,25 KM, u martu 2,27 KM, a u aprilu 2,31 KM.

Prosječna cijena litra bezolovnog benzina 95 BAS EN 228 (BMB 95) u januaru je iznosila 2,20 KM, u februaru i martu 2,19 KM, a u aprilu 2,27 KM.

Istovremeno, prosječna cijena tečnog naftnog gasa LPG pala je sa 1,20 KM po litru, koliko je iznosila u januaru, na 1,18 KM u aprilu.

U prvom tromjesečju 2019. na tržištu Federacije BiH nabavljeno je iz uvoza 244.414 tona naftnih derivata, što je za oko 24,05 posto više u odnosu na isti period 2018. kada je uvezeno 197.030 tona.

Najveći uvoznici bili su Holdina d.o.o. Sarajevo s uvezenih 138.550 tona (56,69 posto), zatim Petrol BH Oil Company d.o.o. Sarajevo sa 43.630 tona (17,85 posto), G-petrol d.o.o. Sarajevo sa 37.035 tona (15,15 posto) i Hifa – Oil d.o.o Tešanj s uvezenih 15.807 tona (6,47 posto).

Prometnici naftnih derivata u Federaciji BiH naftne derivate nabavljaju iz uvoza i od dobavljača u Republici Srpskoj. U istom periodu od dobavljača iz Republike Srpske nabavljeno je 3.524 tona, što je za oko 89,74 posto manje u odnosu na isti period prošle godine kada je nabavljeno 34.330. tona naftnih derivata.

Iz navedenih podataka da se zaključiti da je u prvom tromjesečju u Federaciji BiH nabavljena približno ista količina naftnih derivata i da je udio uvezenih naftnih derivata povećan za oko 24,05 posto zbog manje nabavke od dobavljača iz Republike Srpske.

(fena)

Date: 26-05-2019